

- अखिल भारतीय पुलिस महानिदेशकां अर महानिरीक्षकां रे सम्मेलन मांय देश रा न्यारा न्यारा सुरक्षा संबंधी मुद्दां सूं निपटणे खातिर रोडमैप तैयार करयो गयो।
- सीमा सुरक्षा बल आज आपरो थापना दिवस मना रियो है—प्रधानमंत्री नरेन्द्र मोदी कयो—बीएसएफ साहस, समर्पण अर असाधारण सेवा रो प्रतीक।
- विश्व एड्स दिवस माथे आज न्यारा न्यारा जागरूकता कार्यक्रमां रो आयोजन—केन्द्रीय स्वास्थ्य मंत्री जे.पी. नड्डा लोगां सूं एचआईवी संक्रमितां रे साथे संवेदनशील व्यवहार अपणावण री अरज करी।
- राजसमंद मांय आज सूं कुंभलगढ़ फेस्टिवल री रंगा-रंग सुरूआत।

000

भुवनेश्वर मांय राख्या गया अखिल भारतीय पुलिस महानिदेशकां अर महानिरीक्षकां रे सम्मेलन रा आखिरी दिन आज देश रा न्यारा न्यारा सुरक्षा संबंधी मुद्दां सूं निपटणे वास्ते आवते बरस खातिर एक रोडमैप तैयार करयो गयो। सम्मेलन मांय प्रधानमंत्री नरेन्द्र मोदी देश रा न्यारा न्यारा राज्यां अर केन्द्र शासित प्रदेशां सूं जुड़या खास सुरक्षा संबंधी मुद्दा माथे चर्चा करी। मुख्य रूप सूं साइबर अपराध, तटीय सुरक्षा अर माओवादी उग्रवाद सूं निपटणे सारू मंथन करयो गयो। सम्मेलन मांय केंद्रीय गृह मंत्री अमित शाह, केंद्रीय गृह सचिव गोविंद मोहन, राष्ट्रीय सुरक्षा सलाहकार अजीत डोभाल भी मौजूद रिया। सम्मेलन मांय शीर्ष पुलिस अहलकारां अर न्यारी न्यारी सुरक्षा एजेंसियां रा प्रमुखां रे साथे आर्टिफिशियल इंटेलिजेंस अर ड्रोन जेड़ी उभरती प्रौद्योगिकियां सूं मिळी चुनौतियां अर आतंकवाद विरोधी रणनीतियां माथे भी विचार-गोई व्ही। सम्मेलन मांय नारकोटिक्स जेड़ा खास मुद्दां माथे भी चर्चा करीजी।

000

सीमा सुरक्षा बल—बीएसएफ आज आपरो थापना दिवस मना रियो है। बीएसएफ री थापना रो लगस देश री सीमावां री रक्षा करणो अर सीमावर्ती खेतरां मांय शांति अर सुरक्षा बणाये राखणो है। इण री थापना 1965 रे भारत-पाकिस्तान युद्ध रे पछे सीमावां री सुरक्षा खातिर करीजी ही। ओ विश्व रो सब सूं बड़ो सीमा सुरक्षा बल है। इण मौके माथे प्रधानमंत्री नरेन्द्र मोदी जवानां ने शुभकामनावां देवता थकां सोशल मीडिया माथे पोस्ट मांय कयो कि बीएसएफ साहस, समर्पण अर असाधारण सेवा रो प्रतीक है। वणा देश री सुरक्षा अर संरक्षा मांय बीएसएफ री सतर्कता अर साहस री सराहना करी। केंद्रीय गृह मंत्री अमित शाह थापना दिवस माथे बीएसएफ कर्मियां अर वारा पिरवारां ने बधाई देवता थकां आपरे संदेश मांय कयो कि बीएसएफ रा जवान देश रे सम्मान अर महत्वाकांक्षावां री रक्षा पूरी दृढ़ता रे साथे करी है। श्री शाह कर्तव्य री राह माथे सर्वोच्च बलिदान देवण वाळा बहादुरां ने श्रद्धांजलि दी। मुख्यमंत्री भजनलाल शर्मा सोशल मीडिया पोस्ट माथे 'सीमा सुरक्षा बल' रा सगळा वीर जवानां, अहलकारां अर वाणा पिरवारजणां ने सीमा सुरक्षा बल रे थापना दिवस री शुभकामनावां दी।

000

विधानसभा अध्यक्ष वासुदेव देवनानी अजमेर मांय पहाड़ियां माथे गैर कानूनी रूप सूं रह रिया बाहरी लोगां री धरपकड़ अर पहचान खातिर विशेष टास्क फोर्स बणाणे रा हुकम दिया है। श्री देवनानी काले अजमेर रा सर्किट हाउस मांय जिला कलेक्टर अर पुलिस अधीक्षक ने इण बारा मांय हुकम दिया। इण रे चालता वणा आगली बिरखा सूं पेल्यां शहर री ड्रेनेज व्यवस्था मांय सुधार करणे रो कयो। साथे ही वणा पुलिस अधीक्षक ने

अभय कमांड सेंटर ने नाइट विजन कैमरां सूँ लैस करया जाणे अर पुलिस गश्त बधाणे रा हुकम दिया।

000

जैसलमेर रा गडीसर सरोवर, बड़ा बाग, धोलिया अर डीएनपी खेतर मांय आं दिनां कबूतरां री न्यारी-न्यारी प्रजातियां निजर आणे सूँ पर्यावरण अर पंछी प्रेमियां मांय खुशी री लहर है। देश-विदेश सूँ आवण वाळा सैलाणी भी आने देखर घणा राजी व्हे रिया है। म्हाणा खबरनवीस बतायो कि पर्यावरण विशेषज्ञां रे मुजब सरहदी जिळा मांय बिरखा रो औसत बधणे अर वृक्षारोपण अभियानां रे कारणे भांत-भांत रा कबूतरां री मौजूदगी देखणे ने मिळरी है।

000

विश्व एड्स दिवस माथे आज देश-प्रदेश मांय न्यारा-न्यारा जागरुकता कार्यक्रम राख्या गया। केन्द्रीय स्वास्थ्य मंत्री जगत प्रकाश नड्डा इण मौके माथे लोगां सूँ एचआईवी संक्रमित मिनखां सारू संवेदनशील व्यवहार अपणाणे री अरज करी। मध्यप्रदेश रा इंदौर मांय राखीज्या एक कार्यक्रम मांय श्री नड्डा कयो कि केन्द्र सरकार एचआईवी सुरक्षा अधिनियम 2017 रे मार्फत संक्रमित मिनखां रे साथे किंणी भी तरह रो हो रियो भेदभाव रोकणे रे काम करयो है। वणा बतायो कि प्रधानमंत्री नरेन्द्र मोदी रे नेतृत्व मांय सरकार जांच अर उपचार री नीति माथे अमल करयो। वणा कयो कि इण रा नतीजा स्वरूप अबे देश मांय एड्स सूँ होवण वाळी मौतां मांय उन्यासी फीसदी री कमी आई है अर नुवा संक्रमण भी 44 फीसदी कम व्ह्या है। श्री नड्डा कयो कि भारत ने इण बीमारी री सब सूँ सस्ती अर कारगर दवा बणाणे मांय सफलता मिळी है।

स्वास्थ्य मंत्री आस जताता थकां कयो कि भारत बरस 2030 तांई इण बीमारी सूँ मुक्त हो जावेला। वणा एड्स सूँ पीड़ित मिनखां रे मानवाधिकारां री रक्षा करणे रो हेलो करयो।

प्रदेश मांय भी एड्स रोग रा बारा मांय जागरुकता खातर कार्यक्रम व्हीया। डूंगरपुर रा मेडिकल कॉलेज अर एआरटी सेंटर री कानी सूँ जागरुकता रैली निकाळीजी। कोटपूतली-बहरोड़ जिला रा बानसूर मांय सरकारी स्कूल मांय पढेसरियां ने एड्स उन्मूलन खातर देश मांय चलाया जा रिया कार्यक्रमों री जाणकारी दी। पाली रा राजकीय बांगड सफाखाना मांय संगोष्ठी रो आयोजन व्हीयो।

000

राजस्थान कर्मचारी चयन बोर्ड री कानी सूँ आज सूँ पशु परिचर सीधी भर्ती परीक्षा शुरू हुई। तीन दिन तांई चालण वाळी आ परीक्षा दो पारियां मांय राखी जा री है। पारियां रो बगत सुंवारे 9 सूँ दोपहर 12 बज्यां तांई अर दोपहर ढाई बज्यां सूँ सिज्यां साढे पांच बज्यां तांई राख्यो गयो है। प्रदेश रा न्यारा न्यारा जिलां मांय राखी जा री इण परीक्षा ने लेर प्रशासन खास बन्दोवस्त करया है। हनुमानगढ़ मांय आज जिला कलेक्टर न्यारा न्यारा परीक्षा केन्द्रां रो अचाणचुके जायजो करयो। आज ही देश रा 25 राष्ट्रीय विधि विश्वविद्यालयां री प्रवेश परीक्षा कॉमन लॉ एडमिशन टेस्ट-क्लैट-2025 रो भी आयोजन व्हीयो। प्रदेश रा तीन शहरां जयपुर, जोधपुर अर कोटा मांय इण रे खातिर परीक्षा केन्द्र बणाया गया हा।

000

जयपुर मांय बालश्रम टास्क फोर्स ट्रांसपोर्ट नगर मांय ऑटोमोबाइल रिपेयर री 7 दुकानां माथे छापा मार र वठे काम कर रिया 11 बाल मजूरां ने छुड़वायो है। छुड़वाया गया सगळा बाल मजूरां री उमर 11 सूँ 15 बरस रे बीचे है। वरिष्ठ श्रम निरीक्षक अंकिता महर्षि बतायो कि आं बाल मजूरां ने परामर्श अर अस्थाई संरक्षण खातिर गांधी नगर स्थापित बाल कल्याण समिति री टीम ने सूंप्यो गयो है।

000

राजसमंद मांय आज सूं कुंभलगढ़ फेस्टिवल री रंगारंग सरूआत व्ही। कुंभलगढ़ दुर्ग सूं सरू व्हीया इण तीन दिवसीय उच्छव रे तैत पर्यटन महकमो अर जिला प्रशासन री कानी सूं हल्ला पोल सूं शोभाजातरा निकाळीजी। म्हारा संवाददाता बतायो कि दुर्ग परिसर मांय सुंवारे रे बगत प्रदेश रा लोक कलाकार आपरी रंगा रंग प्रस्तुतियां दीं। इण रे चालता पर्यटकां मांय खासो उच्छास निजर आयो।

000

दिल्ली-मुंबई एक्सप्रेस-वे माथे कोटा जिला रे मुकुंदरा हिल्स टाइगर रिजर्व रे कने बण री 8 लेन टनल मांय काले देर रात माटी ढहणे सूं चार मजूर मळबे मांय दब गया। आ मांय सूं एक री मौत व्हेगी अर तीन मजूरां ने सफाखाना मांय भर्ती करायो गयो है। मरण वाळा देहरादून रो निवासी हो। इण हादसा माथे एनएचएआई रो मुख्यालय एक कमेटी गठित कर जांच सरू कर दी है।

आ कमेटी पूरी सुरक्षा ऑडिट करेली जिण मांय टनल रा विशेषज्ञ व्हेला। वे पतो करेला कि ठेका फर्म कानी सूं सुरक्षा ने लेर कई कई इंतजाम करया गया हा अर हादसा रे कारणां रो पतो लगाने रो जतन करेला।

000

सिरोही जिला रा रोहिड़ा मांय पुलिस नाकाबंदी रे चालता एक कार सूं 53 किलो डोडा पोस्त बरामद करयो है। कार चालक मौके सूं फरार व्हे गया। पुलिस अधीक्षक अनिल कुमार रा हुकम माथे जिलेभर मांय चलाया जा रिया नशीली चीजां रे खिलाफ खास अभियान रे चालता आ कार्रवाई करीजी ही।

000

प्रदेश मांय घणखर जगावां माथे कम ऊं कम तापमान 10 डिग्री सेल्सियस रे आसे-पासे बण्योडो है। मौसम केन्द्र जयपुर रे मुजब लारला चौबीस घंटां मांय सब सूं कम 7 दशमलव 2 डिग्री सेल्सियस कमती तापमान मांउट आबू मांय दरज व्हीयो। सिरोही मांय 8 दशमलव 2 डिग्री, सीकर रा फतेहपुर मांय 9, डबोक मांय 9 दशमलव 1, चित्तौड़गढ़ मांय 9 दशमलव 2, बारां रा अंता मांय 9 दशमलव 5, भीलवाड़ा मांय 9 दशमलव 8 अर राजधानी जयपुर मांय 13 दशमलव 2 डिग्री सेल्सियस कमती तापमान दरज करयो गयो। मौसम महकमो आवता पांच दिनां रे चालता प्रदेश री घणखर ठोडां मांय कमती ऊं कम तापमान मांय खास बदलाव नी होवण री आस जतायी है। इण रे चालता राज्य मांय कठे भी शीतलहर अर घणो कोहरो छाणे रा आसार नी है।

000

सिक्किम रा राज्यपाल ओमप्रकाश माथुर अर पैली आळी मुख्यमंत्री वसुंधरा राजे आज श्रीगंगानगर जिला रे सादुलशहर मांय पैली वाळा मंत्री गुरजंट सिंह बराड़ अर प्रद्युम्न कुमार रे निधन माथे संवेदना जतायी। सादुलशहर मांय दिवंगत प्रद्युम्न कुमार रे पैतृक निवास माथे दोन्यू नेता शोक संतप्त पिरवार ने ढांडस बंधायो। इण रे पछे श्री माथुर अर श्रीमती राजे चक-5 एलएनपी मांय पहुंच्या, जठे वणा बराड़ पिरवार सारू संवेदना जतायी।

000